

Dir Dammen an dir Hären,  
Léif Kolleginnen a Kollegen,

Gudden Owend a Merci dass dir iech Zäit geholl hutt fir nees eemol op eiser Assemblée générale dobäi ze sinn.

Ganz besonnesch wëll ech dann awer eise fréiere President de Fernand Muller begréissen, souwéi de Pierre Trausch Grënnungsmitglied vum der AGC.

Vun der Chambre des fonctionnaires begréissen ech hiren Direkter de Georges Muller, an de Marc Poos Allenzwee laangjäreg Membere vum der AGC, souwéi hire President de Romain Wolff deen ech dann awer och nach als President vum der CGFP begréisse wëll.

Wéi mir eis virun engem Joer op eiser leschter Assemblée générale zesumme fonnt haten, du hat d'CGFP zënter e bëssi méi wéi 2 Méint eng nei Exécutive mat u sech „alen“ am Sënn bekannte Gesichter op neie Posten. Opbrochstëmmung war ugesot mat enger Hellewull vun Entrevuen mat ënner anerem dem Minister vum der Fonction publique, der CSV an der FGFC der Gewerkschaft aus dem Gemengesektor, wéi och mat allen Ënnerorganisatiounen déi an der CGFP affiliéiert sinn.

Duerno ass et allerdéngs nees méi roueg ginn an et huet méintelaang esou ausgesinn wéi wann d'Ländchen op gewerkschaftlech Plang fir de Rescht vum Joer nach just esou viru sech hin dëmpele géif.

Vun Zäit zu Zäit ass nees eemol dorop higewise ginn, dass den Accord salarial aus dem Dezember 2016 bis op déi eemoleg Prime nach net ëmgesat gi war an dass déi ominéis 80-80-90-Regelung onbedéngt nees ofgeschaaft soll ginn.

Bon, de Projet de loi fir de Compte Epargne-temps dee jo och am Accord salarial virgesi war ass am Juli deposéiert ginn. Mä soss hat sech awer wat dee leschten Gehälteraccord ugeet wieder näischt gedo. Deen eigentleche Projet de loi mat alle Mesuren aus deem Accord war zwar um Instanzeweie mä dat war et dann awer och schon ... an ass et haut knapp 15 Méint no der Signature och ëmmer nach.

An trotz allem war et fir de Rescht dach awer zimlech roueg op der Gewerkschaftsfront bis ... jo bis am Oktober wou d'CGFP voll aus dem Suedel a riicht an d'Offensive gaangen ass. Gesond Staatsfinanzen an e gënschtegt konjunkturrellt Ëmfeld rechtfäerdeg et schliisslech méi wéi jee fir déi sënnslos 80-80-90-Regelung dach sou séier wéi méiglech nees ofzeschaffen.

Sënnslos war se schon 2011 wéi mir, also d'CGFP mat all hiren Ënnerorganisatiounen, wéi mir se am Kader vum Accord zu de Reformen an der Fonction publique ugehall hunn. A sënnslos ass se haut ëmmer nach well se ausser enger Ausbeutung vum de Stagiairen weider näischt bruecht huet.

Eng sérieux Reform vum Stage léist ëmmer nach op sech waarden wat et de Verwaltungen erlaabt hir Stagiairen als bëlleg Aarbechtskraaft fir 80% vum der Pai zu 100% anzesetzen. Well och wann dat Ganzt als Gefale fir d'Patronat aus dem Privatsektor geduecht war, dann huet sech dës Measure schlussendlech zu weider näischt wéi enger 40 Millioune Spuermoosnam fir

de Staatsbudget entwéckelt. Dëse Chiffer huet zumindest emol de Minister vun der Fonction publique Ugangs des Joers als Präis fir d'Ofschafe vun der 80-80-90-Reegelung avancéiert.

Mä wéi och ëmmer, Ausbeutung bleift Ausbeutung a gehéiert ofgeschaaft. Do ass d'Gewerkschaft absolut an hirem Rôle onofhängeg vun der Tatsaach, dass se 2011 der ganzer Saach allerdéngs zu bestëmmte Konditiounen zougestëmmt hat, Konditiounen déi awer bis ewell net esou ëmgesat gi sinn wéi een sech dat deemools erhofft respektiv erwartet hat.

An dofir hat d'CGFP dann och de 27. November zu enger grousser Protestmanifestatioun opgeruff. Mä vu dass ee mat der Ausbeutung vun de Stagiairen leider net genuch Leit mobiliséiert kritt, stoung dës Aktioun schlussendlech ënner dem Motto „Fir eng sécher Zukunft vun der Fonction publique“ mat Theme wéi d'mangelhaft Ëmsetze vun de Reformen aus dem Joer 2015, d'Ausspille vun den Ënnerorganisatiounen géint d'CGFP, dem Bewäertungssystem, de Rekrutementsproblemer a selbstverständlech der 80-80-90-Reegelung.

D'Reaktioun vun der Politik op dës Manifestatioun war allerdéngs ganz modeste ausgefall an dofir huet de Comité fédéral am Januar decidéiert all d'Parteien unzeschreiwen an hinnen zwou ganz einfach a kloer Froen ze stellen:

Falls dir eleng an der Regierungsverantwortung wiert, géif dir dann déi ëmstridde Punkten aus der Reform mat der CGFP nei diskutéieren ?

A virun allem, géif dir d'80-80-90-Reegelung nees ofschafen oder net ?

Mä nach ir den Ultimatum fir d'Äntwerten ofgelaf war hat de Sujet schon eng gewëssen Eegendynamik entwéckelt: vun engem Moment op deen aneren stoung zum Beispill eng Reform vun der Reform zur Debatte an d'DP hirersäits huet kuerzerhand emol d'Reduktioun vum Stage op ee Joer an Aussicht gestallt.

Kuerz drop konnt dann och ee Secteur eng éischt Extrawurscht fir seng Leit erausschloen an esou nees eemol virun all deenen Aneren seng Scheewercher schon emol an d'Dreschen bréngen. Dass et sech dobäi em den Enseignement handelt wonnert dann och weider keen.

Den SNE mat virop sengem President deen zugläich och Trésorier vun der CGFP ass krut vum Educatiounsminister Satisfaktioun andeems de Stage vun 3 nees op 2 Joer reduzéiert gëtt falls, jo falls een déi eigentlech Conditions de formation fir de Concours erfëllt dat heescht 4 Joer Formatioun Opweises huet. Fir déi déi allerdéngs nëmmen esou en einfache Bachelor also ee vun 3 Joer hunn do bleift de Stage dann awer nach bei 3 Joer.

Ass dat do net iergendwéi en Déjà vu ?

Hat net 2008 schon eemol den SNE Bande à part gemaach a seng eegen Zöppche gekacht a mat soe mir mol enger cleverer Verhandlungstaktik fir net méi ze soen eng Opwäertung vun der Carrière vum Enseignement erausgeschlo ? Mat der Aktioun vun deemools ass sou ze soen als Kolateralschued de Steen vun de Reformen an der Fonction publique un d'Rulle bruecht ginn, Reformen mat deene mir eis alleguer zënter hir eremoloe mussen.

Mä wéi och ëmmer. D'Äntwerten op déi 2 einfach Froen sinn dann och pünktlech fir den 19. Februar erakomm, an d'Resultat war dach éischer ernüchternd. Wann déi eng dach éischer späerlech ausgefall sinn, da waren anerer an hirem Contenu dach éischer utopistesch. D'CSV, d'LSAP an déi Gréng kënnen sech zu näischt äusseren esou laang wéi si nach un hirem Walprogramm bastelen mä sinn awer bereet sech op eng Entrevue mat der CGFP anzeloossen. D'DP mécht eng detailléiert Analyse vun der Stageproblematik a proposéiert seguer d'Schafe vun enger „Ecole d'administration“. Domat rennt si zumindest bei der AGC oppen Dieren an. Schliisslech war d'Créatioun vun esou enger Schoul zënter méi wéi 30 Joer laang ëmmer nees eng vun eise Revendicatiounen och wa mir ni domat duerchkomm sinn. An och déi Lénk, d'KP, den Adr an d'Pirarteipartei hunn der CGFP hir Vuen méi oder manner detailléiert matgedeelt.

D'Regierung hirersäits wier eventuell bereet der Ausbeutung vun de Stagiairen een Enn ze setzen, wëll déi Diskussioun awer nëmmen am Kader vun de nächste Gehälterverhandlungen féieren. Esou een Amalgamm tëschen enger Reform vun der Reform an dem nächsten Accord salarial leent d'CGFP allerdéngs kategoresch of.

Ënner dem Moto „no der Reform ass virun der Reform“ kann een also gespaant sinn wat sech dann elo bis zu den nächste Walen an doriwwer eraus nach doe wäert. Wat loosse sech d'Partei wuel nach alles afale fir sech d'Stëmme vun der Fonction publique ze sécheren a wat bleift dovun nom 14 Oktober iwwereg? Well wéi heescht et dach esou schéin: les promesses électorales n'engagent que ceux qui y croient.

Mä à propos Walen.

Och haut den Owend sti Walen um Ordre du jour. A wann dir herno d'Lëscht mat de Kandidate presentéiert kritt da wäert dir feststellen dass leider eng ganz Rei vun aktuelle Comitésmemberen net méi fir ee weidert Mandat kandidéiere wäerten.

Jidderee vun hinnen oder besser gesot vun eis well ech gehéieren och dozou, huet seng perséinlech Ursach firwat en an der AGC ophale wëll oder muss. D'Ursaache si gesondheetlecher, familiärer oder professioneller Natur respektiv well et eise Statuten no net méi méiglech oder net ubruecht wier fir weiderhin am Comité un der AGC ze bleiwen.

Kee vun eis hält aus Frustr, Flemm oder Resignatioun op. A vun dohir soll a muss een dat esou acceptéiere wéi et ass. Och wann seguer vill Leit aus der éischer Rei also aus dem Bureau exécutif dobäi sinn.

Mä dovun ofgesinn, ass esou eng Situatioun net nei fir d'AGC. Viru 15 Joer ass och schonn eemol de Comité a virun allem de Bureau exécutif substantiell erneiert ginn. A virun 33 Joer huet seguer d'Assemblée générale de Comité, respektiv den deemolege Bureau exécutif carrement ofgewielt.

An ëmmer nees ass et duerno weidergang, mat neie Leit déi mat neien Iddien sech nei Ziler gesat oder al Revendicatiounen mat neien Iddien nees zum Liewen erwächt hunn.

Dës Kéier wäert dat och net anescht sinn an ech sinn iwwerzeugt, dass déi nei Equipe sech sécherlech net langweile wäert. D'Reform vun der Reform, d'Formatioun virum Stage an

och während dem Stage, d'Reform vum Examen-concours an d'Reform vum Horaire mobile sinn nëmmen e puer Sujet déi ëmmer nach d'actualité sinn a bleiwe wäerten.

An eent däerf een och net vergiessen. Och wann d'AGC als Carrièresorganisatioun den Intérêt particulier vu hire Memberen also de Redakteren an de Gestionnaire vertritt, da spillt si awer och eng wichteg Roll wann et em den Intérêt général geet.

Mat 4 Verrieder am Comité fédéral an engem Verrieder am Comité exécutif vun der CGFP, de Romain Wolff net matgezielt well als President ass hien neutral, souwéi mat 5 Membres effectifs an der Chambre des fonctionnaires huet d'AGC d'Méiglechkeet d'Action syndicale wäitgehend matzegestalten. An dat Ganzt am Intérêt vun der gesamter Fonction publique ouni dobäi allerdéngs d'Interesse vun hire Memberen ze vergiessen.

Dass déi nei Equipe un der Spëtzt vun der AGC deeër Aufgab do gewues wäert sinn, dovu sinn ech absolut iwwerzeegt a wënschen hinnen elo schonn vill Erfolleg.

Ech soen iech Merci.